

Bondia! Ha'u nia respeito ba Sua Exelénsia Ministru Fidelis Leite Magalhães no estimadus kolega-sira husi governu, sosiedade sivil, no setór privadu.

Ha'u kontente tebes tanba governu Estados Unidos hili ona Timor-Leste ba *Millennium Challenge Corporation* nia *Compact* ida, programa ajuda finanseira boot ida ba tinan-lima. Hanesan mós ho governu Estados Unidos nia ajénsia-sira iha nasaun-sira seluk, MCC nia servisu agora sai hanesan parte ida ba misaun jerál husi Embaixada Estados Unidos iha Dili no ami envolve no kompremetidu ativamente ba esforsu ida ne'e. Estados Unidos no Timor-Leste nu'udar parseirus metin, no *Compact* ida ne'e sei sai hanesan testemuñu ida ba saida maka ita bele realiza hamutuk.

Ha'u hakarak aproveita oportunidade ida ne'e hodi rekoñese no fó bemvindu ba ekipa *Millennium Challenge Corporation* husi Washington, DC, ne'ebé mai hamutuk daudaun ho ita iha semináriu importante ida ne'e.

*Millennium Challenge Corporation*, ka MCC, nu'udar ajénsia ajuda externa Estados Unidos nian ne'ebé inovadora. MCC funda husi prinsípiu-sira katak fó prémiu ba nasaun-sira ho governasaun forte, halo investimentu-sira bazeia ba dados no orienta ho evidénsia, no kapasita nasaun-sira hodi lidera sira-nia desenvolvimentu rasik.

MCC nia foku úniku ba desenvolvimentu ekonómiku hanesan ida husi dalan-sira ne'ebé efikaz liu atu atinje redusaun kiak ne'ebé jeneralizadu no duradoura iha nasaun-sira ne'ebé iha desenvolvimentu. MCC nia investimentu-sira konsentra liu ba infrasetrutura – hanesan estradas, pontes, portus, eletrisidade, edukasaun, servisus públiku, no produsaun agrikultura hodi bele

habelar kresimentu longu-prazu, hamenus kiak, no estimula investimentu privadu.

Ha'u hakarak hatete liafuan balu kona-ba saida maka distinge MCC husi doadór-sira seluk. Primeiru, MCC nia programa-sira pertense ba no lidera rasik husi nasaun parseiru. Ne'e signifika nasaun parseiru-sira mak dezeńa programa-sira bazeia-ba sira-nia prioridades rasik. Ne'e programa ida ne'ebé sei verdadeiramente mai husi Timor ba Timor.

Segundu, MCC adota abordajen ida bazeia ba rezultadus hodi identifika projetu-sira ne'ebé sei iha impaktu boot liu. Uza dadus no evidéncia, ami-nia ekipa sei serbisu hamutuk hodi dezenvolve no depois implementa projetu-sira ne'ebé halais kresimentu ekonómiku hodi hamenus kiak.

Ohin lora, MCC investe ona liu biliaun dolar sanulu resin rua (\$12) iha projetu-sira iha mundu tomak, no dezempeña papel boot ba beibeik iha Ázia. Ajénsia ne'e nia investimentu-sira iha infraestruturá no reforma polítika iha Ázia ultrapassa ona liu biliaun dolar rua (\$2) iha tinan lima ikus ne'e no sei aumenta tan biliaun dolar ida (\$1) iha tinan lima tuir mai, koloka ajénsia ne'e nu'udar governu Estados Unidos nia investidór boot liu iha rejiaun ida ne'e.

Agora, xave ba ita-nia susesu tuir mai maka parseria ne'ebé forte entre ita-nia ekipa rua ne'e. Ha'u enkorajada tebes ohin haree partisipasaun husi parte-sira governu nian, sociedade sivil, no setór privadu. Ita-boot-sira nia kontribuisaun ohin no iha futuru indispensável hodi dezenvolve programa *compact* ida ne'ebé transformativu ba Timor-Leste.

Ita-boot-sira nia partisipasaun iha loron ohin hatudu kompromisu Timor-Leste nian ba valór no prinsípiu-sira iha MCC nia laran liga-ba boa-governasaun, demokrasia, no investe ba rekursu umanu. Valór-sira ne'e no prinsípiu-sira ne'e importante atu bele alkansa prosperidade komun.

Ha'u hakarak elojia Governu Timor-Leste ba susesus demokrátiku-sira ne'ebé nia konsege halo ona. Ha'u mós hakarak rekoñese kompromisu inkrível ne'ebé governu Timor-Leste halo ona ba programa *compact* ne'e. Enkuantu MCC oferese rekursus financeirus no téknikus, Governu Timor-Leste maka responsável ba implementa projetus no polítika importante no reforma institusionál-sira ne'ebé bele sai hanesan opsaun sira ne'ebé politikamente difisil.

Objetivu husi semináriu iha loron ida ne'e maka atu diskute dezafiu prinsipál-sira ba kresimentu ekonómiku iha Timor-Leste. Semináriu ne'e hanesan inísiu ida husi prosesu atu identifika no hili problema espesífiku-sira ne'ebé povu Timor-Leste hakarak rezolve.

Estadus Unidus no Timor-Leste kompremetidu serbisu hamutuk hodi hasae oportunidades ekonómikus ba ema-hotu iha Timor-Leste. Ami fiar katak Timor-Leste ida ne'ebé prósperu, demokrátiku, no seguru, di'ak ba Estadus Unidus, di'ak ba rejiaun, no di'ak ba mundu.

Ami agradese tebes ba ita-boot-sira-nia apoiu, no hein ba oin serbisu hamutuk ho ita-boot-sira iha tinan hirak tuir mai. Obrigada barak!